

Nova cumparsa da La Tuatschina



La stad 2021 ha *Ursina Vinzens* surpriu la Stamparia la Tuatschina digl anteriur possessur *Claudi Monn*. La gasetta locala La Tuatschina, ch'ei era il fegl official dalla vischnaunca Tujetsch, ei ina dallas impurtontas incumbensas dalla stamparia. Gia dall'entschatta ch'ella ha surpriu la fatschenta haveva la grafica il giavisch da modernisar empau la gasetta che cumpara mintga duas jamnas e d'adattar il layout e la scartira. Gest ad uras per l'emprema numra dil 2022 ei quei reussiu ad ella. Oz vegn La Tuatschina che ha survegniu in pulit «refresh» repartida allas abbonentas ed als abonnents. Gia il frontispezi (mira foto) paleisa ch'ei ha dau midadas. Il maletg furmicla (Wimmelbild) dall'artista e caricaturista *Barbara Donnarumma* fa biala paretta e vegn ad esser el futur sil frontispezi che muossa sco usitau era mintgamai ina foto. Cul temps vul *Ursina Vinzens* era far enqual midada da cuntegn. (fmr/sr) [Pagina 5](#)

La Tuatschina modernisada

Oz cumpara l'emprema ediziun da La Tuatschina dil 2022 e quei en niev vestgiu. La gasetta locala ei empauet pli moderna, ha in niev frontispezi, ina scartira pli emperneivla da leger ed era il cuntegn duei successivamein vegnir adattaus al temps.

SUSI ROTHMUND/FMR

La stad vargada ha *Ursina Vinzens* surpriu la Stamparia la Tuatschina digl anteriur possessur *Claudi Monn*. In'impurtonta incumbensa da quella stampetta ei la realisaziun dalla gasetta

locala La Tuatschina ch'ei era il feagl official dalla vischnaunca Tujetsch. Gia cu ella ha surpriu la stamparia haveva Ursina Vinzens en mira da modernisar empauet quella gasetta che cumpara mintga duas jamnas.

Pli giuven e frestg

La Tuatschina cuntegn rapports e protocols ed autras informaziuns communalas. Per gl'auter in mix d'actualitads, historia, raquents da pli baul ed inserats. Sezza scriva Ursina Vinzens plitost pauc, quei survetsch fa ina squadra da redacturas e redacturs voluntaris. Enzacons contribueschan quasi per mintga edizium in artechel ni plirs ed auters sporadicamein. «Nus sespruein d'esser fetg actuals, mo era cheu havein nus aunc potenzial da svilup. Jeu publicass bugen aunc dapli reportaschas d'events locals», declara Ursina Vinzens ed aschunta ch'ella seigi era vid motivar persunas giuvnas da scriver per La Tuatschina. Quei purtassi in vent pli frestg ella rapportaziun. Ina da sias finamiras ei era da porscher dapli pils affons e giuvenils e d'integrar quels ella rapportaziun. L'editura ha aunc massa ideas che spetgan mo da vegnir realisadas.

In furmicler tuatschin

La Tuatschina – che ha mintgamai 48 entochen 60 paginas - dumbra ver 1100 abbonentas ed abbonents ella Val Tujetsch, mo era egl jester. Oz tegnan ei lur nova Tuatschina enta maun e l'actualisaziun croda gia en egl sil frontispezi. Quel muossa in maletg furmicler (Wimmelbild) cun massa objects e caussas che vegnan attribuidas alla vischnaunca Tujetsch. L'idea persunter vegn dad Ursina Vinzens e cun l'artista *Barbara Donnarumma* – che habitescha a Mustér – ha ella anflau ina caricaturista che ha capiu da realisar sias ideas. Sil maletg ves'ins il viaduct da Bugnei, la baseglia parochiala, la tuor da signals sil pass Alpsu, urdeins da sport d'unviern e da stad, l'uolp, la Tgès'alva, la pendiculara, las cauras ed il campadi mo era tuortinas da nuschs, cristallas e perfin in reffel d'encurir izuns e bia auter. «Tut quei fa ora nossa vischnaunca e damiez il maletg che vegn a restar sco tochen da cheu. Nus lessan mintgamai publicar vinavon ina fotografia, tenor pusseivladad da fotografas e fotografis indigens ni hosps da vacanzas», di la nova possessura dalla stamparia.

Surveseivel e structurau

Cun oz ha La Tuatschina era in niev layout cun tetels da rubrica ed in'otra scartira. Quella ei bein pli graschla che la veglia, denton gia sin l'emprema egliada in bionton pli bein legibla. «Aschia spargnein nus in bionton spazi e quel stat a disposiziun per dapli contribuziuns», declara l'editura ch'ei da professiun graficra. Ella ha era dau empau dapli structura alla gasetta locala. En l'emprema edizium dil 2022 ha ella era integrau codes d'access rapid (QR). Ulteriuras modernisaziuns ein previdas. A liunga vesta forsa perfin in'edizium da La Tuatschina online. «Jeu hai plascher dall'emprema edizium dil 2022 e sun spannegiada sillas reacziuns. Jeu sun adina aviarta per ideas ed impuls», aschia Ursina Vinzens.

«Jeu hai plascher dall'emprema edizium dil 2022 e sun spannegiada sillas reacziuns.»

Ursina Vinzens